

建德縣志

建德縣志卷十四

人物志

政治 孝友

文學 慈善

武功 隱逸

俠義 流寓

技術 方外

貨殖 列女附

諸馮以舜傳畢郢以文傳周之伍員漢之朱買臣或爲寓賢或爲鄉賢事蹟較著以其時尙無建德前志僅附名雜記若嚴光爲舊郡所得名縣治沿江皆彼游釣之處兼之或釋或仙或貞或烈人之傑益足徵地之靈其姓氏烏可沒也志人物

政治

晉

朱興字元起唐相宋璟之祖初授冀州刺史佈恩德著威望中外重之西晉建興四年十一月漢王劉曜陷長安大丞相琅邪王睿出師

露次移檄四方恢復晉室元起帥領精銳五千護丞相睿渡江會各
勤王師於石頭城直抵建業羣臣勸進尊號睿乃卽皇帝位改元建
武是爲元帝論南渡功封開國侯食邑建德開府公村卒賜祭葬勅
建家廟子二長夔次奭夔居公村奭居鄆縣

隋

陸知命字仲通父敖陳散騎常侍知命性好學通識大體以貞介自
持釋褐陳始興王行參軍後歷太學博士南獄正及陳滅歸於家會
高智慧等作亂於江左晉王廣鎮江都以其三吳之望召令諷諭反
者知命說下賊十七城得其渠帥陳正緒蕭思行等三百餘人以功
拜儀同三司賜以田宅復用其弟恪爲汧陽令知命以恪非百里才

上表陳讓朝廷許之時見天下一統知命勸高祖都洛陽因上太平
頌以諷焉文多不載數年不得調詣闕上表請使高麗曰臣聞聖人
當宸物色芻蕘匹夫奔跼或陳狂瞽願暫綴旒纘覽臣所謁昔軒轅
馭曆旣緩夙沙之誅虞舜握圖猶稽有苗之伐陛下當百代之末膺
千載之期四海廓清三邊底定惟高麗小豎狼顧燕垂王度含弘每
懷遵養者良由惡殺好生欲諭之以德也臣請以一節宣示皇風使
彼君臣面縛闕下書奏天子異之歲餘授普寧鎮將人或言其正直
者由是待詔於御史臺煬帝嗣位拜治書侍御史侃然正色爲百僚
所憚帝甚敬之後坐事免歲餘復職時齊王暕頗驕縱暱近小人知
命劾奏之暕竟得罪百僚震慄遼東之役爲東曉道受降使者卒於

師時年六十七贈御史大夫

唐

宋恕字推之璟第五子賦質英敏好讀書昆季互相師友嗣聖元年授都官郎中朝廷大事多所參議不庇親信不阿權貴中外憚之開元三年父璟貶睦州推之解組隨父至睦展謁開國侯廟尋璟遷廣州刺史臨行語之曰公村吾家肇源之地廟墓在焉吾以君命不可復留汝宜居之復家於此

宋堅字子貞元和間以進士除山東青州刺史下車首重農桑親詣臨朐稷山祭告后稷祠於清節里重新齊相晏子廟一日過金嶺驛見山陡絕削礪巖行人苦之爲甃石砌級漸成大道凡一州十三縣

案無積牘去之日士民攀轅有泣下者當時比之龔北海云

宋嗣宗字元之尹奉化縣縣爲海隅僻壤重岡複嶺介於四明山之陰無車馬承應之役下車伊始曰此可藏吾拙也於是鳴琴臥治四境翕然報最得上考以忤上官解組婦孫處秀剛直敢言嗣宗誠之曰汝父戇而多言故不令人仕汝宜戒之於是變化氣質由守令陞大理寺寺丞執法明允平反無私時朝政不肅四方騷動京師有偶語者司城得之輒指爲盜同官用意模稜草菅人命處秀必委曲開陳全活甚衆

宋

王古字敏仲自貳卿出守會稽成都等郡紹聖四年謫守宜春天性

慈仁政舉綱領而已

江公望字民表初登進士爲河南縣尉久旱喜雨賦云雲氣紛紛雨脚勻嬾花柔草起精神雷車卻輾前山過不洗原頭陌上塵司馬溫公爲留臺聞此詩曰若人有憂國愛民之心公望謁之自此受知建中靖國初由太常博士除左司諫徽宗嘗夢有題亭樹壁間數語者覺不曉所謂及公望進對所論列多與夢合上甚喜謂可以大任每進劄子皆根據義理時右司諫陳祐以論曾布罷去公望入對曰陛下臨御以來易三言官逐七諫臣非天下所期望也夫諫臣養之不可不素用之不可不審遇之不可不厚聽之不可不察去之不可不謹上然之又抗疏論主繼述分元豐元祐起禍亂之源言甚懇切先

是嘗語陳佑曰人臣對君父極言不下事惟上不欺天中不欺君下不欺心則可免戾意見各有不同惟不可傳會祐他日爲上誦之上歎爲名言以論事出守睢陽尋召爲左司員外郎除直龍圖閣知壽州復以言落職蔡京爲政編管南安軍遇赦復官歸而卒建炎四年詔贈諫議大夫官其後弟公著公佐皆登進士

宋忠字則盡政和五年登進士第除翰林院待詔屢遷至集賢殿大學士立朝端肅有直聲每當召對輒以親君子遠小人愛民節用爲亟亟罷花石之貢整備虜之師一切時政利弊慷慨直陳時徽宗雅好神仙方士命忠詔諭內外道院廣修醮事忠入內直諫引秦皇漢武以諷上不懌忠終不奉詔越日上御宣和殿親製木石畫圖賜忠

諭曰以卿剛直如木石故以此旌之忠謝恩出黃文獻公爲之贊且賦詩紀盛紹興間乞歸後聞金兵南下國勢日促不食數日而卒弟孝字則竭生性醇謹與乃兄忠同補上舍弟子

朱夢說字巖隱徽宗時以布衣獻直言謂入仕之源不清不急之務太繁宦寺之權太盛語甚切至後登進士高宗時累遷秦州軍事推官岳飛聞其賢辟爲幹辦公事時辛炳爲御史中丞屢言宰執大臣之罪而罷黜之夢說以時尙禽色之樂而忘二聖播遷貽書責其不諫炳惶恐袖夢說書上陳高宗不說乃諭飛罷之飛厚贐而謝遣之喻樗字子才號玉泉中建炎三年進士第二人趙鼎去樞密居常山樗往謁因諷之曰公之事上當使啟沃多而施行少啟沃之際當使

誠意多而語言少鼎奇之都督川陝荆襄辟爲屬紹興初高宗親征
檮見鼎曰公度此舉果出萬全乎鼎曰義不可更屈故贊上行耳事
之濟否非鼎所知也檮曰然則當思歸路鼎曰策安出檮曰張德遠
有重望居閩莫若使其爲江淮荆浙福建等路宣撫使俾以諸道兵
赴闕下命下之日府庫軍旅錢穀皆得專之宣撫來路卽朝廷歸路
也鼎入奏起浚知樞密院事浚至執鼎手曰此行舉措皆合人心鼎
笑曰子才之功也於是往來鼎浚間多所裨益授秘書省正字檮與
張九成皆言和議非便秦檜旣主和出知舒州懷寧縣通判衡州已
而致仕起爲大宗正丞轉工部員外郎出知蘄州孝宗卽位用爲提
舉浙東常平以治績聞淳熙七年卒著有大學中庸論語解及玉泉

語錄行世

徐瑒字文之紹興三年通判袁州歲大歉瑒發廩賑恤貧者給醵病者給藥歿者給槨收養嬰孩踰百數民深德之時版曹以宜春產絹委市絹萬匹瑒力控免尋擢守建昌邦人咸惜其去云

馬大同字會叔紹興甲戌進士自初仕即以剛介聞改秩除國子監簿入對便殿明日上謂宰執曰夜來馬大同奏對朕與之辯論凡不然朕說者三氣節可嘉由是受知孝廟有大用意後每對上輒陳恢復大計歷中外要官必求盡職以洗冤澤物爲己任仕至戶部侍郎學者稱爲鶴山先生

方道字夷吾淳熙八年以通直郎知武康縣武康密邇行都易致越

訴道律身既嚴部決公平不科罰一錢寬猛得宜訟以衰少縣出絲
纒賴以濟稅課郡利其美使別儲以俟命縣無所從出商人患苦倍
征旁出山蹊公私交病道請於郡復舊規蠲宿逋申法禁減則例以
招之曾不踰時來者輻輳井邑爲之改觀米道至豐儲倉退却至數
百斛典吏鬻妻子不足以償道於他州縣賤糴取贏以補其數又以
餘貲代下五等畸稅義役良法也行之或反以致害道更立規式勸
諭誠篤民咸信之追科不事鞭扑閒出郊野食用百須皆以自隨無
纖粟之擾於是爭先就役他縣至取以爲法嘗久雨有怪民昌言水
且大至人皆悚懼謀避亟捕至庭焚其書械繫以俟期既不驗杖而
逐之有訴夫久出不還知其必死而迹不明者道爲設方略得姓徐

者一問卽承境內盜賊帖息雨暘致禱多驗洊值豐歲上下熙然提
刑劉穎行郡謂太守曰自蘇至此惟武康無一詞至前益專務行所
學視四境如一家不表暴以取赫赫名而民實受惠便坐有梧桐瑞
香一日甘露降其上晶瑩潤液浹日不稀邑人聚觀士夫形於歌詠
者數十人其去也遮道挽留越境追送者不以數計仕終淮南安撫
司叅議

元

王文彪字君采泰定丁卯授温州路瑞安州判官役法久弊文彪爲
第其貧富均賦之法民大稱便大府因委之賦平陽役不閱月而畢
杭之鹽官海岸崩行省檄諸州遣官修治文彪被檄董其役不踰期

而事集宰臣察其廉能辟行省掾史歷湘鄉州知州州界湖湘之表而隣於溪峒其民獷悍難治文彪至一以義理化之作爲條教約民共守三年信義旣明威惠並著兇頑者變爲善良治行於湖南稱最年七十致仕歸

明

洪子詳洪武初知眞定縣時條教方新子詳調緩急布恩威撫良鋤橫務招輯安養起凋殘而還之康阜民咸愛戴之

魯謙字文讓洪武二十三年由人材授刑部員外郎累官至福建左參議宣德二年賜誥有踐更多任克舉厥職之褒進階朝議大夫

林貢

一作林黃

字浚仲洪武二十八年由儒士爲蘇州府推官歷大理寺

寺正出爲開封府知府居官廉能所至稱之改任交趾卒於官兄貫洪武間以明經爲本學訓導

何海建文己卯解元永樂初授給事中值靖難之後陳時政三事一重理焚失舊章一軍衛幕官宜選通曉文理識達政體之人一軍官幼小者宜遴老成舊官一人相兼管事俱奉允行海持身正直居官廉介家無儲蓄士論高之

孫瓊字萬芳建文時由太學生授景陵知縣持身廉介綽有能聲永樂三年蘇松大水壞民田廬命吏部選天下賢能令督理凡十有八人瓊與焉修築圩岸疏決壅滯咸底成績事竣以老疾乞歸

烏濬字士哲永樂甲申進士授禮科給事中剛介敢言尋卒於官

郎慶字士正永樂甲申進士授中書扈駕遷都順天轉戶科給事中
多所建白遷河南按察僉事在任明允勤慎吏治肅清後召入京欲
大用卒於途

陳禮字以敬永樂戊子應天舉人授監察御史有能聲陞河南按察
使洪熙元年賜誥有寬厚和平有爲有守之褒進階通議大夫改廣
東按察使以老致仕

徐述字信古永樂中由稽勳主事擢守漢陽首新學校勸課農桑歲
歉代輸穀數拾萬民以不困時有虎傷人爲文以禱虎卒就捕人以
神明太守稱之歷官福建運使致仕吏部以其治最上賜敕有旣殫
勤敏之勞復著撫字之績語進中議大夫贊治尹

建德縣志 卷十四 人物
張瑄字宣甫永樂四年歲貢授邳州同治有惠政轉太平府通判公廉不苟吏民懷之子忠任汀州通判有循聲

傅宗字本厚少負才藻宣德中由鄉舉授貴池訓導遷國子助教擢翰林檢討兼右春坊陞雲南右參議改四川松潘參議卒於官歷任四朝無銖積以遺子孫有清白聲

汪賢宣德中由太學生授館陶知縣在任公廉吏民悅服卒於官柴文顯正統乙丑進士授監察御史巡按福建激濁揚清凜然有埋輪攬轡之風未幾以冤死前後章奏皆切時政直聲震朝野著有西臺奏疏

郎勝字汝彬正統壬戌進士授行人遷監察御史克振風紀景泰中